

քացիք և մահտեսիք և միաբանք սուրբ ուխտին, և մտաք ի վանս Սրբոյն Յակոբայ իջեվանեցաք՝ երկըրպագելով սուրբ տեղեացն և դամբարանի եղբօր սրբոյ աւետարանչի Յովանէսի: Եւ առաւօտուն (29 Օգոստ.) գնացեալ ամենայն ուխտաւորօք¹⁾ ուխտել զգրունս սրբատեղացն և Սուրբ Յարութեան. և ի դուռն Յարութեան պատուհանէն մտեալ եկթ իմ ի ներս՝ շնորհօքն Աստուծոյ արժանացեալ երկրպագելոյ կենսատու և աստուածընկալ և լուսածաւալ Սուրբ Գերեզմանին Քրիստոսի: Եւ ապա յամենայն աւուր չրջէաք ի սուրբ տնաւրէնութեան տեղիսն մարդացեալ Աստուծոյն մերոյ:

Եւ յաւուր տօնի վերացման սուրբ Սաչին (16 Սեպտ.) ամենայն ուխտաւորօք ի Սուրբ Յարութիւն մտաք զգիշերն և յետ սրբոյ պատարագին ելաք ի դուրս: Նոյնպէս և մտաք Հոկտեմբերի ԻԲ ի Սուրբ Յարութիւն և զպատարագն ի խորան Սուրբ Լուսաւորչին արարաք, որ կայ ի վերոյ սրբոյ տեղի Սաչ գիւտին:

Եւ յետ աւուրց ի Հայր Սաբայ գնացաք՝ տեղիք ճգնաւորացն, որ յայլոս և ի ծերպս վիմաց լերինն աղօթէին: Անդ կացեալ զգիշեր մի ի վանս Սրբոյն Սաբայի՝ ուխտ արարեալ և ապա զգերեզման նորին և զխոցսն արգելական անապատ տեղեացն. և երեք աւուրք ապա ելեալ եկաք ի տեղի մեր:

Նոյեմբերի Ժ Շաբաթի աւուր՝ տօն Սրբոց Հրեշտակապետաց՝ ի Սուրբ Գէորգ գնացաք, և անտի առաւօտուն ելեալ ի Սուրբ Ծնունդ գնացեալ յերկըրպագութիւն և անտի դարձեալ ի տեղի մեր:

1) ըխտաւորօք.